

Daj Iq Maij Gij Vwnzva Vahsengj Vunzlaux Betcib Bi Gyoeb laeb Aenduenz Yisuz Lajmbanj Miz 80 Lai Boux

从小痴迷平话文化 八旬老人组建80多人乡村艺术团

□ Nungz Cih raiz Dahdingz hoiz

Bi' ndwen 80 bi, gig yungzheih hawj vunz naemj daengz gij yiengh bi' ndwen geq ndangdaej nyieg, din fwngz mbouj riengj neix. Hoeng Liuz Ginjyi boux vunzlaux Mbanjdungzloz Sinhcuinh Sahcingj Gaihdaub Gyanghnanz Gih Namzningz Si neix, ciuq-yiengh dwg cingsaenz gvaekgvaek. De miznaj dwk naeuz, bonjfaenh cingsaenz ndei, dwg daj ndaw maij gij hozdung vwnzyi aeundaiej ndeicawq.

Bi' gvaq byaibi, Liuz Ginjyi daiqdaez cujiz laebguh le Aenduenz Yisuz Vahsengj Sinhcuinh Ndwabienz Gyanghnanz Namzningz Si aeu Mbanjdungzloz Sinhcuinh guh haedsim haenx. Baihlaj aen duenz neix miz aen doihfwen Vahsengj ndeu, aen duenz heiq goengsae ndeu, sam aen doih diuqfoux, aen doih habciengq ndeu, gij vunz dinghmaenh miz daengz 80 lai boux, hoeng gij vunz maij yisuz riuzdoengh caeuqfaenh haenx cix lai daengz mbouj miz banhfap suenq okdaej.

Liuz Ginjyi boux vunzlaux neix naeuz, Gyanghnanz Gih dwg dieg-comzyouq gij vunz gangj Vahsengj, vunz lai giekdaj vwnzva Vahsengj conzdungj maenh, de daj iq couh maij fwen Vahsengj vanzlij caeuq bangeq doxcaez ciengq doeg, engqlj ciengz-seiz cauhyuh fwen sei Vahsengj dem. Gyoeb laeb aenduenz yisuz, couh dwg vunz ndaw mbanj iugouz, gij vunz aenduenz yisuz cawzbae gyoengqde Mbanjdungzloz Sinhcuinh, lij miz vunz ndaw Sanhcinh Cunh, Yinzyi Cunh daengj doenghij dieg neix dem. Mboengneix, seiz gicej daej daengz ndaw mbanj caijfangj, vunzmbanj naeuz: "Seizneix mbouj you gwn mbouj you daenj, aeu gyaepgouz cingsaenz ndwenngoenz, daezswng vwnzva binj-vei caeuq cingsaenz yiengjsouh."

1. "Daengx Raemxmaeg" De Baenz Boudaiqdaez Vwnzva Ndw Mbanj

"Byaij vaih haiznyangj ra sien-fwen, diuz sienq yien baengzyoux lajmbwn. Haengj saenq fwen saed-yienh ceiqheiq, mok ndaej boenq sanq haij ndaej dienz." Neix dwg gij sei Liuz Ginjyi seizcaez cauhyuh haenx, ndaw cih ndaw coenz cungj yawj ndaej ok de gig gyaemzmaej caeuq yawjnaek doigvangq fwen.

Liuz Ginjyi dwg vunz bonjdieg Mbanjdungzloz Sinhcuinh, doeg gvaq haujlai saw, doeklaeng youh bae doeg bandacanh cinsiu, dwg gij vunz "ndaw dungx cungj dwg raemxmaeg" ndaw bak vunz ndaw mbanj. Vunz ndaw Mbanjdungzloz Sinhcuinh bingz-ciengz gangj Vahsengj, vunzmbanj youq seiz guhhong maij doiqciengq fwen Vahsengj, neix hawj de daj iq

couh doiq fwen Vahsengj haeuyinx dangqmaz, caemhcaiq daj bangeq gizhaenx hag rox haujlai fwen Vahsengj. Riengz cihsiz menhmenh demlai, de hainduj gaengawq gij minzfungh minzsuz dangdieg cauhyuh fwen Vahsengj, sei Vahsengj, siujbinj Vahsengj, mboujdan bonjfaenh ciengq, hix son hawj vunzmbanj ciengq. Aenvih gij fwen, siujbinj de cauhyuh haenx gig cieq deihheiq, swnh bak dangqmaz, ndigah gig ndaej angqcoux.

Liuz Ginjyi bi 1999 duiyouh le, yungh dingz lai seizgan daej guh gij hong cauhyuh conzdungj vwnzva Vahsengj caeuq biujyienj. "Bi 2006 hawfwen Vahsengj youq Namzningz Cauzyangz Gvangjicangz banh haenx, couh dwg dou gyoengqvunz maij eu fwen neix guh hwnjdaej lo, moix daengz ngoenzsinghgiz, baenz geijbak vunz cungj daej eu fwen." Liuz Ginjyi naeuz, seizhaenx cijaew dwg gij vunz maij eu fwen Vahsengj, cungj rox hawfwen Vahsengj Cauzyangz Gvangjicangz. Daengz bi 2012 Cauzyangz Gvangjicangz guh senj faex ndaem caeuq coih gvangjicangz, gyoengqde youh senj hawfwen baedaengz Namzningz Sinhsiu Gunghyenz, moix daengz ngoenzsinghgiz hai hawfwen, moix baez cungj miz geijbak vunz camgya.

Mbanjdungzloz Sinhcuinh miz 1600 lai vunz, saimbwk geqoiq ca mbouj geijlai cungj dingq gvaq, eu gvaq fwen Vahsengj, vunz lai giekdaj fwen Vahsengj laegna. Liuz Ginjyi naeuz, gaenh geij bi neix, vunzmbanj doenggvaq riuzcienj diegnamh, ndwenngoenz bienqvaq gig hung, haujlai vunzmbanj genyi de daiqdaez cujiz aen duenz yisuz ndawbiengz ndeu. Youq ndaej vunzmbanj iugouz haenqrem, de gizlawz cungj buet, buet gaihdaub, minzcwng bumwnz, vwnzdij bumwnz ragouz bangcoh caeuq bwh'anq, aenduenz yisuz dauqdaej youq bi' gvaq byaibi cujiz laebbaenz lo.

2. Hwnj Daiz Couh Yienj Ndaej Vunzmbanj Bingz-ciengz Maengxmaej Cienz-ciengq Fwen Vahsengj

Bineix ndwen 2 ngoenz 25, Liuz Ginjyi cujiz aenduenz yisuz youq henzgyawj Gyanghnanz Gih Sahcingj Fuloz Siujgih banh le aen cienciengz yienjok "Gvancez Cibgouj Daih, Caezguh Aen Loqsiengj Cungguk", gij neiyungz biujyienj miz habciengq fwen Vahsengj, saimbwk doiqciengq fwen Vahsengj, ciengq heiq goengsae, doeg fwen sei Vahsengj, caeuq ciengqgo diuqfoux daihneix dem, biujyienj lienzdaemh sam aen lai cungdaez, gij vunz daej ngonzyawj



▲ Gyoengq bouxyienj duenz yisuz camgya yienjok.

haenx yaek daengz cien vunz.

Aenduenz yisuz laebbaenz ngamq song ndwen lai couh banh ciengz biujyienj hung baenzneix lo, doiq neix, Liuz Ginjyi naeuz: "Gij cezmuz biujyienj cungj dwg vunzmbanj gag bien gag yienj, hoeng suijbingz hix mbouj yaez. Aenvih vunzmbanj bingzciengz cungj maij fwen Vahsengj, gij vunz aen duenz yisuz moix daengz ngoenzsinghgiz couh daej Sinhsiu Gunghyenz swnh yinx biujyienj, bingzseiz hix maij doxcomz youq giz ndeu doengzcae ciengq, miz biujyienj goengdaej, hix miz haujlai cezmuz youq seizlawz cungj aeu okdaej biujyienj ndaej. Gyoengqde bingzseiz dwg vunzmbanj, hwnj daiz biujyienj couh dwg boux- yienj lo."

Liuz Ginjyi yienznaeuz bi' ndwen yaek daengz 80 lo, hoeng ciuqyiengh miz gij sim caeuq ndangdaej bouxcoz. "Mwngz yawj gyoengq vunzmbanj dou, bingzseiz cungj maij eu fwen, cingsaenz yienghsiengq ndei, gvanhaeh huzndei, neix couh dwg gij gagsaenq vwnzva ndwenngoenz vwnzva daiqdaej haenx." Bouxlaux neix miznaj dwk naeuz, gij mimiz de ndangdaej ndei couh dwg maij eu fwen.

3. Sam Daih Vunz Caemh Daiz Aeu Swnjcienz Ndei Gij Conzdungj Vwnzva Vahsengj

Liuz Ginjyi lwnh gicej, seizneix gij vunz cujyau aenduenz yisuz cungj dwg vunz bangeq. De maqmuengh doenggvaq aen duenz yisuz daiqdoengh caeuq yingjyangj, ndaej hawj mbanj bouxcoz ndiepgyaez gij conzdungj vwnzva Vahsengj, camgya haeuj ndaw hwnjguh vwnzva lajmbanj bae.

Seizneix, Liuz Ginjyi moix ngoenz banhaet 6 diemj hwnqdaej

dingq gvangjbo, roxyiuj cwngcwz fapgi caeuq seizsae cwngei guekgya, "Cauhyuh fwen Vahsengj hix aeu gaenjriengz yamqdin seizdaih, cij ndaej engq yinx vunz." Liuz Ginjyi naeuz, de yaek laebdaeb cauhyuh, aenvih gij fwen de cauhyuh haenx depgaenh gij saehhung guekgya caeuq gij vunz, saeh henz ndang, menhmenh, mizmbanj bouxcoz hix gyahaeuj ndawde bae lo.

Aen cienciengz biujyienj bineix ndwen 2 ngoenz 25, vunzmbanj Vangz Yenfwng, Liuz Siyi gvanbaz ranz dog sam daih vunz cungj daej camgya. Liuz Siyi naeuz, de caeuq mehyah de cungj dwg vunz aenduenz yisuz, mehyah Vangz Yenfwng dwg vunz ndaw aen doih diuqfoux minzcuz, de dwg vunz ndaw aen doih diuqfoux ciuhneix, doengzseiz hix eu fwen. Baez neix biujyienj, daeg lwg de youq baihlaeng aendaiz biujyienj guh hong houguz, lwgbawx dwg boux bauq cezmuz. De caeuq mehyah bonjfaenh biujyienj diuqfoux caeuq eu fwen, daeglan biujyienj doeg sei Vahsengj, yinx ndaej bouxyawj dopfwngz mbouj dingz, de roxyinh miznaj dangqmaz. De maqmuengh bouxcoz cungj ndaej maij gij conzdungj vwnzva Vahsengj, hawj lajmbanj haihoengh gij va vwnzmingz.

Liuz Ginjyi naeuz, Vahsengj conzdungj youq dangdieg gig ndaej sim vunz, Gyanghnanz Gih bi 2013 ndaej bingz baenz Mbanjranz Vwnzva Vahsengj Cungguk le, vunzmbanj engq roxyinh miznaj lo, hix engq maij fwen Vahsengj lo. Vunzmbanj giet-dingh fatyengz gya' gvangq vwnzva bonjdieg, fungfouq ndwenngoenz seizhoengq, hix hawj engq lai vunz gamjsouh daengz gij yinxdaez vwnzva Vahsengj.